

\id 1TI

\c 1

\mt KLAYA TETE SO TIMOTIUS NOGO SO PAULUS LO KLIK GO SAM

\s Nuik: Suey, Paulus lo pu go

\r 1 Timotius 1:1-2

\p

\v 1 [Genam ngge Paulus, Ki Wali Iram lo mot-dak goso](#), Woy Dem Yesus go tamot so mo lemoy. Yang! Ki Wali Iram imot so susuoy go nuik. Nggano, Iram Yesus imot go kutrui, imot go duduing naklay Nemot blo no ip go don ey gabe bubung. Ki Wali Iram ey Woy Dem Yesus ey golo pu goso,

\v 2 at go dem Timotius nogo sam ngge, genam lo gabe klik-situgu. Seni so, (genam lo nguok goso), Iram Yesus no dabui klaya mot mo keng. Ngga ey genam go dem sop so mo lemoy gabe. Taiti-klum, klum nggano nenem-yakay, Ki Wali Aya ey imot go Woy Dem, Iram Yesus ey go sik sogo senang so mot ey mea susuing.

\s Nuik: Tap paysing sogo ngunguok go nogo mang-king

\r 1 Timotius 1:3-11

\p

\v 3 Se senong! Kota Epesus sogo klui-klui tap paysing so ngunguok go gemang. Ngganemot sogoso, nan Makedonia sono genam klong sogo no, pu go kalik, nggeasui tandali genam lo duing go: kota Epesus so mot se susuing! Tap paysing sogo itak genang, klui-klui ngga mot lo se bebat!

\v 4 Tap paysing sogo ngga: Mambut pepen, tang pung go sogo nebut-a, senang so pepen go, no, nebut ngga naklay logo, ple-sagui-a mea lelemoy.

Seni so, ngga kalik golo, Ki Wali Iram go duduing, gemang waydang. Duduing ngga, Iram Yesus no dabui-a klaya iti go, suey so keng genang uwayang go.

\v 5 [Yang, klui-klui ngga so bebat go nebut-mang naklay go seni](#): Blong duo yap nogo Klum seguong-a pung genang! Klum ngga, dabui-iku seni lo dabui klaut sik so gabe pupluok.

Iram Yesus no waysagi ey mlak go sik so, pupung go.

\v 6 Esang! Blong duo yap temu, klum-tap suey so kua duduing golo, nebut seni kua go-a way-way so, sosok so duduing golo, wali tap mo nega.

\v 7 Nemotnang lo duing go: [Musa logo demu trui, suey so atnang lo gabe ya nguok](#).

No, esang! Nemotnang logo nebut-a gemang pepen, no suey so kua senong. Nggano, nemotnang logo tasam-tasam-a tetaling go, nemot go seni nemotnang tang so maning kua mlak dali.

\p

\v 8 Yang! Imot-a naklay gabe mo yang: Ki Wali Iram logo demu teguop-dato seni! No, ngga ba sogo kunala duing-a, keng go se mlak. Kunala duing-a suey so kua mlak go, nemot go seni ya kua ikum.

\v 9-10 Ngge se senong dali: Musa lo iti go demu ngga, Ki Wali Iram go suong ku no mo suey go sikabung nogo so, kua. No,

- wali demu so seguoy go sikabung nogo so iti go.
- wali demu no keng genang moy sogo;
- Ki Wali Iram no waydang go;
- piam-a pupluok-klong go;
- wali nogo dewi kua bubut go;

- blo sik sogo teguop go nogo ta kua kokong go.

Yangga:

- unen-nglangin ey sedue temu ey goso bubut go;
- kamea, tawaluk-a pupluok go;
- luandante;
- nebut so iwot go:
- wamoy mlue sogo ta-a nenat go sikabung.

Nggano, tasam piam go temu naklay so pupluok go ey wali tap seni ey goso uwaydang go sikabung nogo so Musa logo demu trui iti go gabe.

\v 11 No, se senong! Wali tap seni sogo Deguo Teguop ba so gabe gigit.

Deguo Teguop ngga genam go ta no Ki Wali Iram lo mo iti. Ki Wali Iram teguop seni!

Deguo Teguop sik so, Nemot go blong naklay gabe ngap.

\s Nuik: Ki Wali Iram go klum tang so, taiti suey pupu go

\r 1 Timotius 1:12-17

\p

\v 12 Iram Yesus imot go Woy Dem no, ngge genam lo gabe pupu: “genam lo kuklue kangok so mo semu, nebut kemlea kon ey golo mo yat go.

No, keballi sedue so, Mot lo mo kuoy. Taiti suey! Keballi semu genang don, genam nogo Mot lo mo iti. Yang!”

\v 13 Nemot-a, banim go, Woy Dem go blung ey, genam lo wayang go, yat go, kuklue kangok so mo semu. No, esang! Ku ngganemot nogo, genam Yesus Iram so maning kua senong go tang so, tasam ngga piam sogo genam kua duing. No, Woy Dem go klum lo genam naklay mo kut.

\v 14 Yang! Woy Dem, Iram Yesus, imot lo keng go don, klum-nuik gabe.

Taiti-klum naklay, genam ba nogo, Nemot lo mo tram.

\v 15 Yang, Wali nebut ngge, seni so mo pen-nengam: <<Sikabung kon ey go, wali genang sogo so Blong Dem Yesus, kukunan blo no mo weng!>>

Esang! Kon kangok go sikabung naklay sik sogo, Genam ngge, kuklue kangok go dega gabe.

\v 16 Nemot-a genam, sedue kon kangok dega go nogo, Iram Yesus go gigling ba nogo tang so, klum kangok so Ki wali Iram lo kuduong so mo taling. Nemot go seni: Sikabung temu Iram Yesus dabui ba no iti genang, ngga sik so senang-wali iti genang so, ibe lo ikum genang, genam gabe lemoy.

\v 17 Yang! Ki Wali Mani Iram, nemu logo yakua ikum go, Nemot seguong-a, klay-kim. Nemot go sui senang so blo sono se iti! Ngga seni so, (Amen)!

\s Nuik: Timotius go ta no Paulus lo keballi iti go

\r 1 Timotius 1:18-20

\p

\v 18 Dem sop, Timotius, mot ngge se duing dali! Ngga ku nogo, nabi go lom lo wali tap keballi genang so, mot Ki Wali Iram lo mo pu go taling.

Ngga ku nogo, senong go blong duo yap go lom lo wali tap keballi genang so, mot go ta no, genam gabe iti-situgu.

\v 19 Nabi lo pen go tegadi ngganemot, suey so mot go dabui ba nogo se pupluok. Ngga ey, ple sedue kalik se lemoy, keballi ngge don ey pupluok genang. Iram Yesus nogo waysagi ey mlak go sik so, dabui iku seni lo keballi ngge gabe pupluok.

Esang, Blong duo yap temu gemang. Kebali piam golo nemotnang go dabui-iku, wali-
pega nega go, ngga ey Iram Yesus nogo kekeng, mo waluk.
\v 20 Nemotnang ngganemot sik sogo: Himenius-dem, Aleksander-dem ey gemang dali.
[Sedue namon ngganemot, Ki Wali Iram so uwayang go](#), itak genang so, Kupiam go ta
sono, genam lo mo iti. Tandali wayang genaning!

\id 1TI

\c 2

\s Nuik: Dewi pu genang tap

\r 1 Timotius 2:1-7

\p

\v 1 Dem Timotius! Ngge kalik go-a banim se semu: “Sikabung go wali naklay wali
genang, dewi se pupu! [Dewi ba no pu genang, ngge-a se:](#)

- [taiti wadong genang;](#)
- [dewi senang so se keklak;](#)
- [ibe dewi se pupu;](#)
- [ngga ey Ki Wali Iram nogo taiti suey iway se i-iti.](#)

[Sikabung go wali naklay wali genang, dewi ngge kalik go se pupu!](#)

\v 2 Nggano, wengkabui-wengkabui, iram, trang-bemey, nemotnang sogo dewi se pupu
dali.

\v 3 Seni so, wali ngga kalik dewi ba logo, suey. Ki Wali Iram, imot so susuoy go suong
ku nogo, teguop dato.

\v 4 Yang! Ki Wali Iram lo duing go: Sedue kabung naklay, wali susuoy genang, Iram
Yesus logo wali tap seni ey go senong go se mlak.

\v 5-6 Ngga nang sogo, wali tap seni, se senong:

- Ki Wali Iram, dui ey klay-kim got-ton.
- [Nggano, Ki Wali Iram sono tandali sikabung ngengam keduik genang
dikuoy tap klaya dali: Iram Yesus-a klay Duo gabe.](#)
- Kukunan sikabung go ide-way lek genang so,
Blong Dem go wali dui ey iti go, kin pi go mo ngengam.
- Blong Dem ibe no taling go ngga, Ki Wali Iram lo duing go ku suey gono mo
lemoy gabe.

\v 7 [Yang, ngge Deguo Teguop seni ey go gemang. Nggano saula-saula nogo **ngga** nguok
klong genang tamot so, genam mo mot-dak.](#) Ngge seni so gabe, wamoy kua pen-atugu.

Yangga: Yesus, Iram sogo, sikabung no taling go,
wali tap seni sogo nguok klong genang so, genam mot-dak go.

\s Nuik: Dewi ba no pluep go nogo tap

\r 1 Timotius 2:8-15

\p

\v 8 Ayanang se tup! Dewi degut go nogo mang, ngge kalik gabe kiking: Dewi pu so
degut go nogo, piam kua go ta-a, blo no iti go dabui piam kua goso, Ki Wali Iram nogo
dewi, suey so motnang se keklak!

\p

\v 9 Mianang-kabung, amka suey go, suey so ikum go-a se kok. No, ngge kalik go ya kua:

- betodop srem ey kut go;
- srem bumeno-bumeno, emas lo semu go;
- nguoy-un-dan, amka duoy blo sogo lo iti go; saysuk temoy no kok go, Ki Wali Iram nogo, seni kua!

\v10 Ki Wali Iram no dabui iti go kabung logo dabui ba srem-a, tasam suey golo, semu go ey se!

\p

\v 11 Mianang-kabung! Wali tap ngunguok go nogo, keng-duduk so, ta kong ey yakot so se!

\p

\v 12 Se tup! Sedue go da, kabung logo yakua suing. Ngga tang so, sedue-a kabung logo ibe blo nogo ya kua nguok. Ngga genam kua yang gabe.

No, kabung-a, sedue ba no nemot go sip no se suing!

\v 13 Se duing: sikabung so Ki Wali Iram lo semu-ngam go nogo, Adam-dem-a, sedue so banim semu-ngam gono, Epa-debui-a kabung so gemang semu-ngam dali.

\v 14 Se duing dali: Banim nogo kon ba no Adam dem-a, Lema lo kua lek go kenong gabe. No, Epa-debui-a, Lema lo lek go, kon ba nogo gabe pui. Ngga kalik semu go tang so, Ki Wali Iram lo sak kok go demu, kabung lo mo seguoy.

\v 15 No, wali tap ngge, kabung se senong: Iram Yesus no dabui lo waysagi ey mlak go, wali-klum dabui kon kua go wegeng-a se koklong. Ngga ey, duduung-blong-alay klaya seguong, Ki Wali Iram sono dabui se iti. Kabung ngga suey so keng go nogo, duo tui genang sogo nebuem nebit, Ki Wali Iram lo susuoy wali genang yay mea suing.

id 1 TI

\c 3

\s Nuik: Blong duo yap nogo (trang) wengkabui kangok go

\r 1 Timotius 3:1-7

\p

\v 1 Yang! Ngge seni solo: “Nando lo, Blong Duo-yap nogo (trang) wengkabui so duduen go, ngga seni ey go kebal so, duen go gemang. Ngga teguop seni!”

\v 2 No, (trang) wengkabui teguop goso lemoy genang, nemot go wali-pega naklay suey so se! Yangga:

- senun, klaya seguong;
- saysuk yay don ey suing;
- kunala segu go ey;
- wali ta suey so mlak go;
- glop keda so mea wawi go degut go;
- nggano, ngunguok genang sogo kalong ey se.

\v 3 Ngga ey,

- bu don ey go miam ey kua dedrop go;
- ple sagui keda so kua go;
- ngengam so, ta pla sogo-a;

- taut nogo dabui kua iti go;

\v 4 Nggano,

- yap-tenglam yay suey so suing go;
- duo-yap logo suali-ta ey, suey so se kokong!

\p

\v 5 Se duing! Nemot go yap-tenglam suey so ta kua mlak go, sogo kalik so, blong duo yap wali tap logo, nemot lo ya wawi go koklong?

\v 6 Ngge, se duing dali:

- Iram Yesus no demening keng go sedue, keda so (trang) wengkabui sogo ya kua taling go lemoy. Ngga tang so nemot dabui ta tegue go,

Kupiam pui go idekeba [kalik](#) dali lek genaning.

\v 7 Yang!

- Ibe logo nemot go wali nogo ta ey se kong. Nemot nogo, dia idi sogo sikabung logo ta ya kua nat.

Ngga tang so, Kupiam go don lo, nemot lek genaning.

\s Nuik: Blong duo yap nogo tegay (diaken)

\r 1 Timotius 3:8-13

\p

\v 8 Nggano, blong duo yap nogo tegay taling genang, trang kangok go dali kalik,

- [suey go wali, nemudi sogo-a;](#)
- bu don ey go babu so ya kua drop;
- taut nogo dabui kua iti go;

\v 9 Ngga ey:

- Iram Yesus go wali tap seni so gigit gono, dabui-iku lo waysagi ey mlak go se koklong.

\v 10 [Kebali ta maning kua mlak gono, banim no, nemotnang senong genang nemu suey so se luik. Kuklue kua ikum goso, wali keballi pluok genang sogo, mea taling.](#)

\v 11 Nggano, mianang blong duo yap ba sogo no tegay (diaken) so taling go,

- wali suey go nemudi sogo-a;
- meno duo sogo lomtui-lomtui kua pepen;
- saysuk yay-a don ey se suing;
- [nemot tang so pen go nebut, seni so ta mlak go se pluok dali.](#)

\v 12 Sedue tegay so taling (diaken) go

- senun klaya seguong-a se;
- nemot go yap tenglam, duo-kabung nogo, suey so se tetaling.

\v 13 Yang! Tegay-tegay (diaken) keballi suey so pupluok go, wali seni kangok go sik sogo tang so, blo sono go sui mea pu. Nggano, Iram Yesus waysagi ey mlak go nebut, don ey ibe nogo, tegay-tegay ngganemot lo mea tetaling.

\s Nuik: Ki Wali Iram ba sogo seni ngga, Iram Yesus gabe

\r 1 Timotius 3:14-16

\p

\v 14-15 Yang! Genam (Paulus) go duduing: Motnang nemu-guoy genang keda so genam mea pung. Nago no keda so sang kua pung go, sam ngge gabe kiklik. Se senong! Ki Wali Iram go “uduo-nebo” wali genang, sam ngge sik so mea ikum! Yang! “Uduo-nebo” ngga,

Ki Wali Mani Iram go blung gemang! [Blong ba lo koklong go blung ngga, kutrui ey neguon ey go kalik, seni ey go Kutrui blo no, don ey wali tap suey so seni ey se klik.](#)

\v 16 Yang! Wali tap ngga ba so gigit go, blong-don kangok dega seni gabe!

Ngga Iram Yesus. Nemot nogo lek-luik sogo, ya kua! Se duing!

- \q1 Nemot sikabung so kukunan blo nogo mo blong;
- \q2 Nemot seni ey go ibe nogo Wali Newet lo mo taling;
- \q2 Nemot go blong, Ki Wali tamot sono wali sip no mo ngap;
- \q1 Nemot sogo deguo saula-saula sono gemang pepen klong;
- \q2 Nemot kukunan sikabung logo mo yang;
- \q2 Ki wali yakena blong sono tandali Ki Wali Iram lo mo wawi.

Yang! Iram Yesus ba so, blong-don kok go gigit go, dia sono mo ngap!

\id 1TI

\c 4

\s Nuik: Sikabung so paysing go tap

\r 1 Timotius 4:1-5

\p

\v 1 Se tup! Wali Newet logo tang so, ngge kalik don ey mo pen-nengam:

“Yansi go ku pung go nogo kukunan go kuasep kua seni go tap ey maso go tap ey nguok gono, sikabung temu gemang. Esang! Ngga tup go keng golo, paysing go tap lo nemotnang mea degut. “Yansi go ku pung go nogo

kukunan go kuasep kua seni go tap ey maso go tap ey nguok gono, sikabung temu lo keng go, wali mea paysing.

\v 2 Yang! Nemotnang ngga wamoy mlue ey go klui-klui lo gemang lelek. [No, klui-klui wamoy mlue ey go ngga, nemot go dabui-iku, demu koy logo kalik, dasing go gemang mo nega.](#) Esang!

\v 3 Wabui ngge kalik, klui-klui ngganemot logo gabe kiking: “Blong duo yap logo, kabung ya kua iti, sedue ya kua iti!” Nggano don ey gemang poplong: “Ten ngga kua dedam go, ngge-a dedam go gabe!” Se duing! Ten naklay nemot-a Ki Wali Iram lo semu go, imot mo keng go sikabung lo dam genang, nggano taiti suey ey Ki Wali Iram no pu gono, iti go se dam.

\v 4-5 Yang! Ki Wali Iram lo semu-ngam go ngganemot naklay suey dato, klaya nang go kagot sogo kua. Ten ngga naklay, Ki Wali Iram go nebut ey dewi ey golo, kon kua goso gemang mo lemoy. Ngga tang so, yakay ey, taiti suey ey, pupu gono, imot lo mea dam.

\s Nuik: Timotius Iram Yesus go kebal genang so taling go

\r 1 Timotius 4: 6-10

\p

\v 6 Timotius dem! [Yang! Yakay ey taiti suey ey pupu gono, naklay imot lo dam go, ngge blong duo yap nogo suey so se taling.](#)

Ngga tang so, Iram Yesus go kebal sedue sogo, suey so mot mea ip.

\p

Deguo Teguop ey, wali demu seni ey go, mot mo keng go ngga, ku no-woy no ten kalik waysagi ey mlak go dam go, mot go wali don mea kokok.

\v 7 No, mambut pen piam go, nebut-nebut seni kua go, kabung nalo logo kalik popok go, ngga sono se itak. **No, dabui ba sogo keng go don kok genang, ngga seni kangok dega.**

\v 8 Se duing! Saysuk don kok genang so u-usey go, seni imot nogo seguay dato. No, wali tap so u-usey go, seni kangok dega. Yangga, wali inim sogo tegadi gabe! Tegadi inim go seni, wali ngge nogo, senang wali ba nogo ey, mea ikum.

\v 9 Nebut, seni so gabe! Naklay iti go kiking go, ngga suey.

\v 10 **Ngga tang so, wali tegadi seni tegu genang-a, seguot don ey kangok so, atnang gabe u-usey.**

- Ki Wali Mani Iram seguong nogo-a, duduing glok go imot gabe gigit.
- Yang! Sikabung naklay sesuoy genang, Ki Wali Iram lo ta gabe mlak! No, seni-seni so, blong duo yap go wali-a, suey so sesuoy so mea pung.
- Ki Wali Mani Iram seguong nogo-a, nenam so duduing glok go imot gabe gigit.
- Yang! Sikabung naklay sesuoy genang, Ki Wali Iram lo ta gabe mlak!

\s Nuik: Timotius go keballi mang king go

\r 1 Timotius 4:11-16

\p

\v 11 Timotius dem! Nebut pen ngga naklay, sikabung nogo don ey se pepen klong!

\v 12 Mot maning nguot sogo! Ngga tang so mot sedue klayanang go logo, ku sono kenok genaning! No, blong duo yap nogo ngge-a se taling:

Yangga,

- mot go nebut pen;
- mot go wali tasam suey go;
- mot go klum;
- mot keng-duduk suey go;
- wali kon kua go;
- ngga ey mot yatrang suey goso se suing.

\v 13 Genam maning kua pung go nogo, Wali Sam Klaut-a senang so ikum go se pepen. Ngga sik sogo seni, sedue kabung meno suey so buong genang sogo wali nebut mang se ngunguok.

\v 14 Se duing! Mot go taiti wali-pega seni kangok dega! Pupluok genang sogo, mot kua itak. Ngga Ki Wali Iram go nabi lo pu goso, blong duo yap go woy-woy lo, ta mot blo no gemang mo tui. **Sikabung temu wali tap nguok genang, yangga mot nogo taiti wali-pega. Seni kangok dega!**

\v 15 Ngga sik so taiti wali-pega, iti go ngga go seni se u-usey! Ngga, mot go wali ba no bebabu go sikabung naklay ikum go, mea senong.

\v 16 Se senong! Saysuk yay suey so mot se suing! Ngga ey, Wali tap ngunguok go, mot tang go se mlak dali. Ngganemot naklay ba nogo, motnang don ey se suing. Ngga ey, mot tang go susuoy sogo mea wali. Nggano, mot no tup-duk go sikabung susuoy so, mea wali dali.

\id 1TI

\c 5

\s Nuik: Timotius Blong duo yap ey suing genang

\r 1 Timotius 5:1-2

\p

\v 1 Ngge, se tup! Sedue seni nogo nebut, dawin ey go kua pu. No, aya so mot logo se usi. Nggano, ngguot sogo mot go sat-yap so se usi dali.

\v 2 Ngga ey, mianang sogo, mot go mia so se u-usi! Kabung kaguit sogo, kabuisro-yap so dabui klaut no se u-usi dali.

\s Nuik: Yap tenglam yay suing genang

\r 1 Timotius 5:3-8

\p

\v 3 Se tup! Kabung nalo, seni so nalo so itak go, nemot go wali nogo, suey so se tetebok!

\v 4 No, duo ey mamtaton-yap ey go-a, ngge se nguok: Nemotnang tang so, moy nalo yay suey so se susuing. Ngga, wali demu no pen go kalik: “Moy-ay nogo tasuey way se tetaling!” Ngga kalik go-a, Ki Wali Iram go duduing nogo gemang but.

\v 5 Se senong! Nalo seni-seni, banom-a go, Ki Wali Iram seguong no kunala-duduing naklay klaya gemang iti. Use-wadikua go dewi-a pupu go, Ki Wali Iram no don uwadong go ba lo, nalo ngga mea susuing.

\v 6 No, maning kaguit sogo nalo, rley-kaboy seguong-a uwet go ngga, nemot go wali seni mo kebong go kalik, Ki Wali Iram sik sogo ket so gemang.

\v 7 Nalo-nalo go wali sogo mang, naklay-naklay se nguok-sategoy! Sikabung lo piam so pu genaning!

\v 8 Yang! Duo-yap logo nemot go, yap-tenglam ba sogo nalo, nando lo yay suey so kua suing go, ngga kuklue kangok go gemang. Yang! Nemot go kuklue ngga, Wali Tap no kua keng go sikabung ey, kua kerlam.

\s Nuik: Nalo, sedue mo kebong go, sui klik genang

\r 1 Timotius 5: 9-16

(* Senong genang! Nalo-nalo go sui klik go sam, blong duo yap ba sogo gemang. Sam ngga ba no klik genang nalo, Blong Dem go ta seguong no wali naklay mo iti go nalo-a! Ngga ey, dewi-a mata so pupu, wali keballi-a sesemu go. Ngga tang so, nemot go wali nogo, blong duo yap temu lo mea tebok. Ngga nang sogo, tegadi Blong Dem ey gemang ya dok.)

\p

\v 9 Timotius! Kabung nalo go sui so klik go sam ba nogo* nando go sui-a ya klik? Ngga nang sogo, ngge kalik nemu se luik! Yangga:

- Yagui 60 blo no se;
- Sedue da klaya seguong iti go banom-a nalo so susuing go;

\v 10 Ngga ey, nemot go wali suey so kekeng go, ngge kalik se ikum dali:

- Denok yay suey so mo suing?
- Glop suey so wawi go gemang dedegut?
- [Blong duo yap tap-masi so koklong go, yakay ey suey so mo wawi?](#)
- Ide ey go sedue kabung meno, keda so mo tetebok?

Yang! (*Seni so: [Yahudi go demu kalik go: glop go masi, bu ey yap sedue lo mo w.ata. Sikabung lo duing go: ngga tasam suey go!](#))

Tasam teguop go naklay mo senong go kangok so mot lo se u-usey!

\v 11 No, kaguit so sedue lo itak go nalo go sui, sam ba no klik genang, mot lo se waydang! Ngge-a se duing! Nago ku no, sedue iti sogo so neboy go, ngga sik sogo, nalo ngga go don, Iram Yesus nogo duduing mea kua.

\v 12 Ngga ey, dabui ide ey blong duo yap lo duing genaning: Esang! Iram Yesus nogo, tegadi nalo ngge lo mo paysing.

\v 13 Se duing dali: Sedue kabung go yap-yap degut-pung klong golo, nalo sesrok ey mo mlay. Seni so, sesrok seguong-a kua, kabung meno nebut lomtui-lomtui pepen klong go, nebut tuon-tuon nemot ey mea bluot. Ngga tang so, nebut piam-piam go gemang pen koklong.

\v 14 Ngganemot sogo so, genam lo duing go: Maning kaguit sogo nalo, tandali go sedue nase iti! Ngga no duo tui go, yap-tenglam yay suing genang. Nebut piam go imot sogo, ngga tang so plesi lo pepen ey go.

\v 15 Esang! Kupiam go tap lo keng go tang so, nalo temu wali tap mo nega-lak.

\p

\v 16 Ngganemot sogo so gabe pepen: “Nando mia Blong Dem no keng go, nemot go yap-tenglam ba sogo nalo gemang go, yay nemot tang so se suing! Ngga kalik golo, blong duo yap ide so lemoy ey go! Ngga ey seni sogo nalo-a, nemotnang lo yay tetebok genang.

\s Nuik: Blong duo yap go woy-woy nogo

\r 1 Timotius 5:17-6:2a

\p

\v 17-18 Blong duo yap naklay ngge se senong! Seni so, Wali Sam Klaut ba nogo, ngge kalik go gabe mo pen: “Nan so kokop go sapi go lom kua dok!” *ck Nggano: “Kebali sedue, nemot go keballi sogo seguot duoy, se i-iti dali!” Ngga kalik dali so blong duo-yap go woy-woy, wali keballi suey so semu go nogo taiti way da namon so se taling. Seni-seni, Deguop Teguop so pepen go ey, Wali tap nguok genang so u-usey go ey go nogo, se iti!

\p

\v 19 Ngge suey so se tup: Nago no, blong duo-yap go woy-woy so ta nat go, keda so mot kua yang. No, nemot go piam, namon duo-nangglik si lo, nemu luik goso, mot logo se keng go yang.

\v 20 Nago no, seni so piam so semu go, nggano, tap ngga ya kua itak so duduing, Kuklue nandonang lo semu go, ibe blo no nase bebat. Ngga ey neyboy go, sikabung temu ikum go, suali tra go, tap piam go mea kua semu.

\v 21 Timotius! Nggesui go, Ki Wali Iram, Iram Yesus ey, nggano Ki wali tamotnang ey go nemu ku no, gabe pen-asitugu: *“(Nebut mang ngge naklay, lek-luik kua, Tang ey kua pleng! No dabui klaut no mot lo se pupluok.

\v 22 Ngge se senong dali! Blong duo yap temu, wali keballi nang sogo, keda-keda so ta nemotnang blo nogo, mot lo kua tui! (No, kunala temoy no se!) Nemotnang go wali-a, banim suey so se ikum! Esang! Nemot go kon-piam go, kua bebat go sik so, mot tang go kon ngga glung ey go. Yang! Ngge-a se semu! Mot go wali-blong yay-a suey so se susuing!

\p

\v 23 Mang ngge mot no gabe kiking dali: Esang! Da mata so, mot teguan tra golo saysuk don kua go sadui mo tra. Ngga tang so, bu ulue-a kua, anggul ey seguai so se drop dali. Ngga ey, saysuk tandali don kok genang.

\p

\v 24 Mang ngge se duing dali: Seni so, kisebui ku maning gono, sikabung temu go kon-keba-mling dia no gabe nenegon. No, si kabung temu go kon keba mling, dia no maning kua negon go, kisebui ku no pung go mea neyboy dali.

\v 25 Tasam-tasam suey go teguop go ngganemot kalik dali! Sikabung nggeasui golo kekay-kekay so, gabe i-ikum dali. No, tasam-tasam suey go nemu lo maning kua ikum go-a, ku santugun gono, kekay so dia nogo naklay mea pung dali sang!